



# Tir Yimyim



Regd. No. RNI. NAGAAO/2004 / 13113. Postal-NE/RN-717.

e-mail : tiryimyim@gmail.com

TAPAK 7 Yangia anidakangma : Tir Yimyim tiryimyim@aolima tir yimyim TAPAK 3

**PTI lenirtemi tepuokdak Imran Khan ajurutsü mela**

**Tir Murmu-i CEC aser ECs shimba dak sendakba bill agizükogo**

VOL. XXI NO. 79 (ADOK 79) DIMAPUR KÜPTOKNÜ (SATURDAY) LUCHII (DECEMBER) 30, 2023 ₹ 5.00

## Mizoram sorkari CBI nem temelaba agütsür

**Aizawl, December 29, 2023 (Agencies):** Mizoram sorkari Central Bureau of Investigation (CBI) nem bushisüngdang südaksütsü temelaba agütsüogo. "Tashishitsü melii aser ochishia inyaksangshitsü atema tenangzükba lir. Mizoram-i CBI nem bushisüngdang südaksütsü melar. Ozü sorkari sensotem ajungtsü mechi nung ochimashi agientsü nangzük" ta Chief

Minister Lalduhoma-i ashi. Mizoram nung clean governance system ayutsü merangba den iba telemtetba puteper aser iba ajanga ochimashi inyakyim jungjunga bushisüngdangtsü. CBI ya India sorkar indang investigative agency tongtiba lir aser parnoki tang nungibo Mizoram state nung ken o balala bushisüngdang sütettsü.

## ULFA den peace accord 100% inyaksü; CM Sarma

**Guwahati, December 29, 2023 (Agencies):** Centre aser Assam sorkartemi United Liberation Front of Asom (ULFA) pro talk faction den yimjung tenangzüktep agiba nung keta aliba onüktem 100% inyaksü ta Assam Chief Minister Himanta Biswa Sarma-i ashi.

Tanü ULFA (pro talk) den otsüsütsü aketba Peace Accord 100% mapa kuma inyaksü ta Sarma-isa ashi.

"Iba nung Assam aser India sorkartemi inyaksüba onük aika lir. Home Ministry-i northeast nung sign sütepa aliba accords ajak mapa kuma inyaksü atema sentong atonger alitsü. India aser Assam sorkartemi accord 100% inyaksü ta ni amanger. Onok Assam renlokdaaktsütsü aser

India nung tashitait state ka rongnung ka kümdaktsütsü. Onok Assam tejakleni anitsü" ta paisa ashi.

"Tanü iba accord nung sign asüba sülen Assam nung taginübatem ajak ataloktsü. PM Modi-i Assam aser Northeast atema inyaksüba ajanga tensa süngjema kümogo. Tang tashi nung peace accord sign sütepa ajaki yimjung bener aruogo" ta CM Sarma-isa ashi.

"PM Modi lenisüba kübok Northeast nung state ajak den peace accords nung sign sütepogo. Tanü Assam kübok tesem 15% nung dang AFSPA lir aser tanünga tesem ajak nung tensa süngjema lir. Iba accord ajanga Assam nung teti atema yimjung bener arutsü" ta paisa shisem.

## Mizoram, Nagaland, Manipur nung HIV aketer aika lir

**Guwahati, December 29, 2023 (Agencies):** India nung 2000 nungi HIV menatepba kanga ajema kümogo aser 2022 tashi nung HIV prevalence 0.20% lir saka Northeast region nung taoksatsü aketba osang lir.

Taintem dak HIV teimtiba putetba state temji Mizoram (2.34%), Nagaland (1.34%) aser Manipur (0.94%) lir. State asem sülen Andhra Pradesh, Telangana, Karnataka, Meghalaya, aser Delhi nung kanga lir ta HIV Estimates for 2022 ajanga ashir.

Tripura nung taintem dak HIV prevalence 0.22%, Arunachal Pradesh nung 0.13%, Assam nung 0.11% aser Sikkim nung 0.08% lir.

Mizoram nung adult HIV prevalence kanga teimba akümba putetogo aser Arunachal Pradesh, Meghalaya o Tripura nunga teimba akümer. Ajisüaka, Nagaland, Assam aser Sikkim nungbo HIV aketer nisung tasen kangabo meputeter ta report nung shia lir.

"HIV Estimates 2022 ajanga linük nung AIDS azüoktsü merangba takok ngua inyaka aruba sayur. Ajisüaka iba ajanga state kar nung HIV kanga menatepba bushitetogo aser ibaji taoksatsü aketba osang ka lir. Asenok zübazülema malitsüla saka jenjang ajak nung AIDS response maparen inyaksüla aser

AIDS epidemic ya anendaktsütsüla" ta V. Hekali Zhimomi, Additional Secretary & Director General, NACO-i shia lir.

National Aids Control Programme-V ya kümshia HIV tasen menatepba 80% ajemtsü aser 2010 nungi 2025-2026 tashi nung AIDS ajanga asürtem ajemdaktsütsü atema lir. United Nations Sustainable Development Goal (SDGs) ajanga 2030 tashi nung Global AIDS epidemic anendaktsütsü alizüng India-ia agizükogo ta HIV Estimates 2022 report nungsa shia lir.

People Living with HIV (PLHIV) lakh 1 tema aliba state temji Maharashtra (3.88 lakh), Andhra Pradesh (3.22 lakh), Karnataka (2.74 lakh), Uttar Pradesh (1.95 lakh), Tamil Nadu (1.65 lakh), Telangana (1.59 lakh), Bihar (1.56 lakh) aser Gujarat (1.15 lakh) lir.

Ano PLHIV lanurtem (arishi küm 15-24) 15,000 tema aliba state temji Maharashtra nung (21,500), Andhra Pradesh (18,850), Karnataka (18,420), Uttar Pradesh (17,920) aser Bihar nung (16,110) lir.

Maneni Madhya Pradesh, Punjab, Haryana, Odisha, Chhattisgarh, Delhi, Assam, Manipur, Nagaland, Jharkhand, Mizoram aser Meghalaya nunga PLHIV lanurtem 1,000 aser 5,000 tsüngda lir.

## Centre, Assam sorkar aser ULFA tsüngda yimjung tenangzüktep agiogo



December 29, 2023 nü New Delhi nung Centre, Assam sorkar aser United Liberation Front of Asom (ULFA) tsüngda yimjung tenangzüktep nung sign asü dang Union Home Minister Amit Shah den tangartem agiba noksa ka angur.

**New Delhi, December 29, 2023 (Agencies):** December 29, 2023 nü Centre, Assam sorkar aser United Liberation Front of Asom (ULFA) tsüngda yimjung tenangzüktep ka nung sign sütepogo.

Ajisüaka, Paresh Baruah-i aniba ULFA (Independent) telokibo yimjung olemtep anema noktaker.

Assam nung telungpur telok tejentiba den yimjung tenangzüktep agiba ajanga ozüng alema aruba, lisopur atema ali temetentem atema inyaksüba den külemi Assam renloka aotsü atema financial package dena lir.

"ULFA-i akhangba onüktem atema Centre-i mapang lemsar inyaksü aser ULFA telok loksatsü" ta Union Home Minister Amit Shah-i ashi.

"ULFA ketdangsurtem dang Centre dak temulung alemtsü ayongzük aser yimjung maparen takok ngua inyaka aotsü nangzük" ta Shah-isa ashi.

Northeast nung yimjung aser tensa süngjema ya Prime Minister Narendra Modi ajanga lir ta paisa ashi.

Assam aser tanga northeast state tem nung Armed Forces (Special) Powers Act (AFSPA) agienba ajanga telungpur maparen samaba kuli sayur, ta Amit Shah-isa metetdaktsü.

ULFA den yimjung tenangzüktep ajanga northeast nung telungpur khuret tulu ka ajemtsü ta Assam Chief Minister Himanta Biswa Sarma-isa ashi.

Modi-i aniba sorkari northeast nung telungpur telok aikati

prangpong-injang bendanga agütsüba sülen yimjung tenangzüktep aika agiogo. Manipur nung telungpur telok tejentiba UNLF-ia Centre aser state sorkar den yimjung tenangzüktep agiogo.

ULFA ya April 7, 1979 nü Sivasagar, Assam nung tenzük. Lisopur Assamese nung atema state balaka tentettsü nükjidong nung ULFA telok tenzük.

1980s tatemlen Paresh Baruah, Arabinda Rajkhowa aser Anup Chetia nungeri anir prangpong bener maparen kanga bulua inyaka liasü.

ULFA ya mezüngbo nungdakbapur aser sensakertem yariba telok ka ta züngshi saka lia aodang parnoki India sorkar anema prangpong amer raratsü tenzük.

## Mangmetong nung AKM 94 buba Foundation Day among



December 29, 2023 nü Mangmetong yimtsüng nung 94 buba AKM Foundation Day amongdang agiba noksa ka angur.

**Mangmetong, December 29, 2023 (DIPR):** Ao Kaketshir Mongdang (AKM) 94 buba Foundation Day nungtem nung Mangmetong Kaketshir Telongjem (MKT)-i kenten sentong tajung ka ayongzük agiogo.

December 29, 2023 nü Er. Akangmeren playground, Mangmetong nung "We Come Alive" omen nung ajemdaker iba sentong agi.

"Iba sentong ya AKM küm noklang ka benjungmong tetenzük südakjangma" ta Water Resources Advisor Tongpang Ozukum-i ashi.

"Kentenbaren ya industry tulutem nung ka lir aser iba ajanga lanurtem nem maangka balala agütsür. Anungji lanurtemi iba sabang ajanga pei dak aketba sempettem sayutsü aser amshitsü merangang" ta pai ashi. Paisa AKM nung mezüngbuba

Tir asür Supongnuklu indang mangdang tulu atema pelaba metetdaktsü.

Iba sentong nung MKT Tir Tenuyangba-i tesentepertem pelaa agizük aser Village Council Mangmetong Chairman Watitemjen Jamir o AKM Tatong Tir Onenpong nati o tatsütsü jemi.

Sentong nungsa IPR and Soil & Water Conservation Advisor Imkong L Imchen aden.

### CBC Kohima nung FPO Casavi den tepila sentong agi



**Kohima, Luchii/December 29 (TYO):** Ministry of Information & Broadcasting, Government of India kübok Central Bureau of Communication Kohima & Press Information Bureau Kohima ajanga Field Publicity Officer Lhouzotuo Casavi den tepila sentong ka CBC Field Office, Kohima nung December 29, 2023 nü agia liasü.

Iba sentong nung jembidang

P. Sophie, HoO CBC Kohima ajanga ashiba agi, Casavi-i küm 40 tashi jenjang balala nung department tajungtiba agi tenzüka aruogo aser North-eastern region nunga field office balala nung Head of Office inyakogo.

Casavi ya state nung kising masü saka North-eastern region ajunga nung tajangshiba balala ajurua aliba ketdangsür ka lir aser pa ya ni densema officer

aser staff aika asoshi longzüik tajung liasü, ta pai ashi.

Casavi-i sorkar inyakim osang sangdongba aser media nung tangatetba aser tajangshiba peria aliba ya department asoshi rongsen tulu liasü, ta Sophie-i ashi.

Lhouzotuo Casavi aser par kibongi department aser nüburtem mapang talangka tenzüka atema pai tenüngsang agüja liasü.

### Phusachodümi kaketshir 71 buba lokti senden menogo



Phusachodu village nung December 28, 2023 nü 71 buba Phusachodümi Students' Union lokti senden amendang Advisor Küdecho Khamo-i kaketshirtem den jembidang tangokba noksa ka yangi angur.

**Kohima, Luchii/December 29 (TYO):** Phusachodümi Students' Union pur 71 buba lokti senden December 28, 2023 nü Dzüyi Cezu, Phusachodu village nung agia liasü.

Iba sentong nung tesemdanger tongti ka ama jembidang Advisor, CAWD & Taxes, Küdecho Khamo-i kaketshirtem dang yimtsüing asoshi mapa tajung inyaktsü aser meimtsü ayongzüka liasü.

Pai kaketshirtem dang yimtsüing asoshi jenjang tulu aketba rongsen ama akumtsü aser lokti aintsü atema shilem agitsü ajungshi aser kija ajungba nung temelenshi kangabo malitsü akok, saka lokti ajungba nung takok jenti lir, ta ashi.

Pai kaketshirtem dang loktiliba nung metokmeperi samadaksütsü mechi ochi aser meranga inyakba yimya süpatsü ayongzüka liasü.

Cadet ka ama Indian Police Service (IPS) nung Vekhosa Chakhesang shimokba aser yimtsüing dangi konang balala bener arutsürtem nem Advisor Khamo-i tenüngsang agüja liasü.

Pai tanü lima nung tetoktepba yimyatem indang jemi aser kaketshirtem dang nükjidong tajung yur takok angutsü asoshi meranga inyaktsü ajungshi.

Tetoktepba balala nung meranga inyakba ajanga dang takok lenmang angur ta pai ashi aser telemtetba agiba, temulungtetba aser tamakok ajurudang atsüingzüka moi asendenshir inyakba nung tajangzüik aliba indang lemsatepa liasü.

Takum nung takok angutsü asoshi tangatetba tajung nungdakar, ta Advisor Khamo-isa ashi.

Tir o jembidang PSU tir

Shenieta Cürhah-i academic year 2023 nung takok anguba kaketshir nem tenüngsang agütsü aser maneni takok angutsü imlaa aliba lemsatepa liasü.

Pai tsürabortem dang kaketshir den politics mejembitsü ajungshi aser kaketshir dang shisaliok bushiba nung temulung agütsütsü aser nükjidong tajung yur meranga azüingtsü ayongzüka liasü.

Iba senden ya tenzüka Rev. Vevotso Theluo-i sarasadem aser iba sülen VCC Vehüpa Rose-i pela agizükba o jembia liasü.

Iba senden nung Phusachodümi youth society ajanga tetsü-tebou ken ka aden aser sentong tembanga Phusachodümi Baptist Church nung women pastor Vengotsolu Chuzho-i sarasadem.

### Manipur nung sen crore 47 jenjang kozü apu

**Imphal, Luchii/December 29 (Agencies):** Assam Rifles temi Manipur kübok Kamjong district nung sen crore 46.90 jenjang kozü/areca/betel nuts (supari) bags 6,785 apu, ta Hokulbarnü ketdangsür osang ka ajanga ashi.

Kamjong district kübok Namlee market aser Wanglee yimtsüing nung kozü bendenba osang angazüka Inspector General of Assam Rifles (South) kübok Assam Rifles temi Brehostibarnü operation ka agia liasü, ta defense wing ajanga Hokulbarnü sangdong ka nung ashi.

Wanglee village, Namlee village, aser Namlee market telung aser temeket nung ki 13 meita aoba mapang Nagaland, Assam aser danga northeastern states nung bener oa ayoktsü asoshi temelaba makai bendenba areca/ betel nuts ya ngutet.

Iba mapang sen crore 46.90 jenjang areca/betel nuts talep 6,785 nguteta Forest Beat Officer, Nambashi nem amoktsüogo.

Iba yongji Kamjong district nungi arütsü alema areca/ betel nuts shibelentsü tasa yanglua aliba Assam Rifles temi raksatsü.

### Assam Rifles temi sentong balala ayongzüka agi



**Dimapur, Luchii/December 29 (TYO):** Assam Rifles temi Mon district kübok Sheanghah Chingnyu nung December 28, 2023 nü security coordination meeting ka ayongzüka liasü.

Iba senden nung Sheanghah Chingnyu, S Mokok, S Wamsa, S Tangten, Lokyo aser Nyahnyu nungi yimtsüing ketdangsürtem arua aden.

Yimtsüingtem nung security tensa asadangsü aser Assam Rifles aser nüburtem tsüngta tesendaktep tajung yangertsü nükjidong nung iba sentong ya ayongzüka liasü.

Yimjung asoshi security forces den yariteptsü aser ozüing alema inyakshiba azioktsü nüburtemi mulunga aliba iba senden nung lemsatepa liasü.

Dimapur, Nuiland aser Peren district tem nungi kaketshirtem asoshi National Integration Tour ka Assam Rifles temi ayongzüka Rajkot, Gujarat nung aliba 24th Rashtra Katha Shivar semdanga liasü.

Linük telungjem asoshi inyaktsü kaketshir mulungjang nung ajungmesoa iba sentong ya ayongzüik. Iba tour nung kaketshir temi India Gate, National War Memorial semdang aser Rajkot aser Porbandar jila semdanga liasü.

Rashtra Katha Shivar ya December 17 nungi 24, 2023 tashi ayongzüik aser yangji Vidhya Bhawan Higher Secondary School Dimapur aser Nuiland aser Peren district nung aliba Jawahar Navodaya Vidyalaya nungi kaketshir ter den tesayur kati shilem agia liasü.

24th Rashtra Katha Shivar nung armed forces, civil administration, scientists, paramilitary forces aser yimten yimsüsür temi o jembiba kaketshir temi anga liasü.

Parnok dang linük telungjem

indang angazükdaktsü. Iba tour ya Kashiram Basti, Dimapur nung December 13, 2023 nü tenzüik aser December 28, 2023 nü tembanga liasü.

Iba tour tembanga flag-in ceremony agiba nung GBs 22 den kaketshir temi shilem agia parnoki ajangshibatem lemsatepa liasü.

Maneni Assam Rifles temi Indo-Myanmar arütsü anasa Kiphire district kübok Akhegwo Town nung aliba Community Hall nung "Career in Armed Forces" indang awareness lecture sentong ka December 29, 2023 nü ayongzüka liasü.

Kaketshirtem dang armed forces nung mapa balala aliba indang angatetdaksütsü nükjidong nung iba sentong ya ayongzüik aser iba mapang entry scheme balala atema shimba yimyatem tejangja lemsatepa liasü.

Central sorkari armed forces personnel aser parnok kibongtem nem teyari balala agütsüba indanga janga junga jembia liasü.

Iba sentong nung lanur 120 shi aden aser sentong tatemi 'question-and-answer session' agia liasü.

Kasa sentong nung Akhegwo Students' Union tir nem pamphlet tem amoktsü aser scheme balala bushitsü ayongzüka liasü.

Ano maneni Assam Rifles temi Phek district kübok Ziphu aser temeket aliba yimtsüingtem nungi putu menden züingsemtem den security meeting cum awareness session ka December 29, 2023 nü Ziphu yimdak ayongzüka liasü.

Iba senden nung temeket yimtsüingtem nungi VCCs, Village Guards, aser pastor tem dena liasü.

Iba senden nung Indo-Myanmar arütsü nung security dak sendakba ken o balala jembia liasü.



December 29, 2023 nü Chennai nung Union Finance Minister, Nirmala Sitharaman-i DMDK tentetsang, Vijayakanth nem akhüm agütsüdüng tangokba noksa nung angur.

## India-i Hafiz Saeed agüjang ta mepishiogo

**New Delhi, December 29 (Agencies):** Hokolbarnü Ministry of External Affairs (MEA) otongdar, Arindam Bagchi-i, sorkari Pakistan dang 26/11 Mumbai amakba asalentong yanglur tongti, Hafiz Saeed India ket nung agüjang ta mepishiogo, ta metetdaksü. Osangbenertem den jembidang Bagchi-i, India nung ken o jembitsü atema tawa sorkari Pakistan dang kiralongrar Saeed India ket nung agüjang, ta mepishiba den külemi India nung pa anema ken o aika benoka lir ta metetdaksüogo, ta metetdaksü. India-i bushiba kiralongrartem tetsütitem rongnung Saeed densema lir aser US-ia pa apur nem senpet dollar sen million 10 agütsütsü, ta sangdonga lir. November 26, 2008 nungi tenzüka anogo pezünü tashi kiralongrartemi Mumbai amakba mapang nung nisung

166 asü aser nisung 300 yirua liasü. 2008 küm November ita nung kiralongrartemi Mumbai nung tesem aika amak. Pakistan nung aliba Islamic organization-Lashkar-e-Taiba telok nungi kiralongrar 10-i anogo pezü tsüngda tesem aika nung bomb aser injang amshia amak. UN-ia Hafiz Saeed ya kiralongrar ka ta sangdonga lir, ta Bagchi-i metetdaksü. Bagchi-i, "Onoki iba temepishiba agütsüba den külemi Pakistan sorkar nem tapet documents agüja ken o temeja ka jembitsü atema pa India nem agüjang ta shiogo," ta metetdaksü. Hafiz Saeed-i pusemba Pakistan Markazi Muslim League (PMML)-i taruba Pakistan general elections nung shilem agütsü, ta tawa osang sandonga liasü. Hafiz Saeed'er jabaso Talha Saeed-a jenshia senzüdar aser

pai general election nung National Assembly constituency NA-127, Lahore nungi tokteptsü. Bagchi-i, Pakistan nung alia oa inyaktermia election nung toktepbaji tang tasen masü, ta ashi. "Tanga linüktem nung election inyakyim dak sendakba nung ni mejembiner, ajisüaka Pakistan nungbo alia oa inyaktermia election nung shilem agibaji tang tasen masü," ta pai ashi. "Item amaji ajanga asen region security nung mejungi kongshir. Asen linük security nung kongshitsüsa inyakba ajakji onoki maneni mita reprangtsü," ta paisa metetdaksü. Talha Saeed ya Lashkar-e-Taiba (LeT) nung tongti lenirtem rongnung ka lir. Talha-a pa tebu ama Unlawful Activities (Prevention) Act kübok kiralongrar ka, ta sangdonga lir.

## Tir Murmu-i CEC aser ECs shimba dak sendakba bill agizükogo

**New Delhi, Luroi/December 29 (Agencies):** Linük Tir, Droupadi Murmu-i Chief Election Commissioner aser Election Commissioners shimba dak sendakba bill agizükogo, ta Hokolbarnü sorkar sangdong ka ajanga metetdaksü. Chief Election Commissioner and Other Election Commissioners (Appointment, Conditions of Service and Term of Office) Bill, 2023 nung Law minister leniba nung secretary rank level nung nisung ana densema search committee ka shima EC mesüra ECs shimtsü atema nisung pongui akümba selection committee ka shimtsü atema inyakyim lateta lir.

Kasa bill ajanga Ato kilonser, Opposition nung lenir aser Union minister kati Selection Committee tenteta CEC aser ECs tenüngtem Tir matsüngdang benoktsü atema lateta lir. Linük Tirisa Press and Registration of Periodicals Bill agizükogo; iba ozüng ajanga British nungeri yimsüsüba mapang nungi aliba Press and Registration of Books Act of 1867 melentsü. Rajya Sabha nung iba bill ya taküm August 3 nü agizüka liasü. Tirisa Central Goods and Services Tax (Second Amendment) Bill, 2023 aser Provisional Collection of Taxes Bill, 2023 agizükogo.



December 29, 2023 nü Ranchi nung Jharkhand nung JMM sorkar küm pezü ajungba anogomong sentong nung Chief Minister aser JMM, Hemant Soren (ajichilen) aser tebu, Shibu Soren na tangokba noksa nung angur.

## Indian navy tem India nung aliba jail nung ang puoktsüa akok

**New Delhi, December 29 (Agencies):** Tawa Qatar nung aliba court kati taoba mapang Indian navy nung alir nisung 8 nem tasüba temerenshi obendang agüja liasü, ajisüaka iba temerenshiji ajemja jail nung ang puoktsü obendang agütsüogo. December ita tetenzüklen Dubai nung COP28 senden alidang Ato kilonser, Narendra Modi-i Qatar Amir, Sheikh Tamim bin Hamad Al-Thani den jurila senden ka amenba sülen Qatar nung aliba court-i temerenshi obendang ajemtsür. Ministry of External Affairs (MEA)-i sangdong ka ajanga, sorkari maneni legal team aser taoba mapang navy tem kibongtem den jembitepa mera tasen agia inyaktsü, ta metetdaksü. MEA otongdar, Arindam Bagchi-i, sorkari India nungertem aser par kibong züngsemtem atema tebilemtsü kaja inyaker, ta metetdaksü. Yaküm October ita nungi taoba mapang Indian navy 8 ji Qatar nung aliba jail nung puoka lir; parnoki submarine programme ka atema itdangitba mapa inyakogo, ta parnok nem tai tonglokja liasü, iba sülen Qatar court kati tasüba

temerenshi obendang agütsü. Ajisüaka tangbo tasüba temerenshi obendangji ajemtsür jail nung ang puoktsü obendang agütsüogo. India-i maneni parnok tiprongla India-i anir arua linük nung aliba jail nung ang puoktsü atema jembitsü atema maongka nguogo, kechiyong 2015 küm India aser Qatar nati temerenshi obendang agüja alirtem 'transfer' süteptsü atema tezüngzüktep ka agia lir. Iba tezüngzüktep kübok India nung aitsür Qatari nunger par linük nung aliba jail nung ang puoktsü atema agütsütsü, yamaji Qatar nung aitsür India nungertema linüki anir arua linük nung aliba jail nung puoktsü atema melatsü. 2015 küm March ita nung Qatar emir, Sheikh Tamim bin Hamad Al Thani-i India semdangba mapang nung linük anati iba tezüngzüktep agia liasü. Taoba mapang Indian Navy tenji - Captain Navtej Singh Gill, Captain Birendra Kumar Verma, Captain Saurabh Vasisht, Commander Amit Nagpal, Commander Purnendu Tiwari, Commander Sugunakar Pakala, Commander Sanjeev Gupta aser Sailor Ragesh nunger lir.

## Bihar CM, Nitish Kumar JD(U) Tir shimogo



December 29, 2023 nü New Delhi nung Bihar Chief Minister Nitish Kumar, JD(U) National Tir, Lalan Singh aser tangartem JD(U) national executive senden amendang tangokba noksa nung angur.

**New Delhi, December 29 (Agencies):** 2024 küm Lok Sabha election agütsü atema ita ishika dang lia Hokolbarnü Bihar Chief Minister, Nitish Kumar Janata Dal (United) National Tir shimogo. Delhi nung JDU national executive senden aliba mapang Lalan Singh Party National Tir menden nungi anendaktsüba sülen mapang tatsüka tsüngda Kumar Tir shim. Osang angazükba agi, JDU national executive senden tenzüka sülen mapang tatsüka

tsüngda Rajiv Ranjan Singh (Lalan Singh)-i Tir menden nungi anenba shidi agütsü. Sangküm Lok Sabha election nung Nitish Kumar lenisüba nung JDU-i tokteptsü. Hokolbar anüngdang 11:00 ako meta JDU national executive senden tenzüka liasü aser iba senden nungji Bihar Chief Minister Nitish Kumar aser Rajiv Ranjan (Lalan) Singh na densema tongti lenirtem aika aden. Senden jakdang osangbenertem den jembidang

JDU lenir tain, KC Tyagi-i, "Tanü JD(U) national executive senden amentsü aser iba senden nung tang linük yimtenren tensa aser rongsenketzüng jenjang atema o lemteptsü. Iba denji külemi tanga state nunga tokteptsü atema menden lemsatsü asoshi jembitsü," ta metetdakja liasü. Delhi nung aliba Constitution Club nung ayongzükbä senden nungjisa taruba Lok Sabha elections aser opposition INDIA teloktep nung party tem den menden lemsatsü atema jembitsü.



## TIR YIMYIM YIMOBILEM (EDITORIAL)

DIMAPUR KÜPTOKNÜ, DECEMBER (LUCHII) 30, 2023

### Assam nung yimjung

**N**aga nungertem ama Assam nungertema tia majung yimten nüchiso bushirtem rongnung telemsa adoker, kari Assam yimten nüchiso atema nokdakba jenjang nungi teraka asepsüka alur India küboksa süaka jenjang tajungba ka nung alitsüsa India den yimten ken o telemtetba ka aginer, saka ano karibo yimten nüchiso asoshi tatem tashi raraner ta United Liberation Front of Assam (ULFA) telok agi ana kümer aruba sülen, tang India kübok linüba telok den center aser Assam government nati yimten tangatettep ken o ka renemogo. Iba jagi Assam nung teti atema yimjung mapang ka arutsü parnoki imlar. Ibaji BJP teloki aniba center government asoshi takok tuluka asütsü. Atangji, yimten nüchiso bushiba telok ka den yimten nüchisobo magütsü aser mangu ser tangatettep ken o kati arutsü kanga tasak lir. Aji ken o jembir aser amuoka inyakdangertemi dang metettsü. Aji oda, taoba Congress mapang süli, tang BJP mapang süli Naga nung den süshia, Mizo nungertem den süshia aser tang ULFA den süshia yimjung nung yimten ken o tatembang küma jembitetbaji ajak asoshi takok tulu anguba mapa ka asütsü. Atangji, tang Arabinda Rajkhowa-i aniba ULFA telok den Center aser Assam government-i yimten tebilemtsü tatem küma tangatettep ken o yangluaka, ano külen Paresh Barua-i aniba ULFA telokbo Assam yimten nüchiso asoshi sashisashia nokdaka lir, anungji tang ULFA telok ka den tangatettep ken o yangluba yagibo ULFA teloki benokba Assam yimten tebilemtsü kokogo ta koda-anga meshitet. ULFA telok ya 1979 küm Assam nung lisopur lanurtemi Assam yimten nüchiso atema raratsü asoshi tenzük. ULFA telok yabo asenok Naga nung yimten nüchiso bushirtem ama masü saka parnoki parnok nübertem taküm samatsüsüa mapayui tashiyim amshiaa nübertem alidak bomb injang amshia lendong agütsü. Iba ama lendong tapu balala nung nisung meyerijang ter shi asüba rongnung tai maketba senso tajungtemaang teimba densema alitsüa akok. Parnokji shia marutsü aser ibaji kecha agia memenoktettsü. Ibayongji, yashi center aser state government den Assam atema yimten ken o tangatettep kati aruba sülen, ULFA lenir kati nübertem dang parnoki meshitaki inyaka aliba mapa asoshi taidok meshia metetdaksü. Ibaji yimten nüchiso bushiba tongpang nung tesasatsü aser temulung ashitsüsa atalokba mapatem rongnung ka asütsü. Yimten ka kübok lia iba yimten anema yimten nüchiso atema nokdaksüba mapa kanga tasak ka lir. Iba tongpang teraradak nung tetsübu, ayatzüra aser timtem aika ajangshir. Aji dang masü saka külem telok nung mulung melemtep adoker. Idangji, tai maketba züa dena tokshitsüsa akümer. Iba amaji taküm, rongsen aser mapang jenti lalua rarar tesüsa yimten nüchiso mangu ser atemtsüba, atangji, kanga tesasatsü aser tarendaksü mapa ka lir. Ajisüaka, tamakoktsü ka asoshi akümüli piyong merangdangtsüba shisa taka mapa masü, anungji imlaba ama mesüaka akokba jenjang ka tashi nung tangatettep ken o yanglur yimten tebilemtsü ken o tembangbajang shitak asütsü. Tang ULFA telok ka temai adoka center aser state government den yimten ken o tebilemtsü tembanga renemtetba jagi Assam nung lanur 8700 nem taküm tasen agütsür asütsü. Atangji, yimten tebilemtsü ken o anünga meyui khenyongi tembangtsü atema Paresh Barua aniba ULFA dena yimjung ken o jembitsü atema center aser state nung yimten lenirtemi kanga merangdangogo saka yimten nüchiso onük dak alaka tangabo mejembitsü ta tekong merangba agi parnok den yimjung lapoka ken o mejembitet ser ULFA tesadang ka den dang tanü yimten ken o renemer asütsü. Atangji, Paresh Baruah atashia mekazüi yimjung nung ken o latetnertem den ken o tembanga latetbaji center sorkari shitak inyakogo. Joko tangbo Paresh Baruah dang anünga lir, anungji ajibo center aser state government na pronglai yimkong aoleni timi anir arutsü asoshi merangtsüla.

## OLEMSABANG

### Hornbill benjong amongba ya khen meyipa reprangshi nung koda ???

- L.Kika Pongener.

2023 küma Hornbill benjong kanga longso-longsoa meraketa mongogo. Aji oda, khenbo anutoklen aliba kintemi parnokbo Hornbill benjong nung shilem magitsü ta asüba osang ngua benjongji longsoa mamongtsü sudi ta bilema liasü, saka ano telemtetba tajung agir akhi ama shilem tajung agia amongba ngua kanga pelaseta reprangogo. Ashiko, tesuiba kümtem dang nungi bendanger 'Tourists' teimtiba arubaji 2023 küm aru sudi ta bilemer. Hornbill benjong ya otsüla-oboula nunger mapang nungi monga aruba benjong ka masü, saka tanü putu nung purateta amongba benjong ka lir. Aji oda, iba benjong amongba ajanga, Naga nunger alima kin ajakibo memeteti aliba tanübo alimai meteta kümogo. Talisa, tangar bendanger (Foreigner)-bo oda toktsür, India nunger kin karibo Naga nunger ya China, Japan aser Nepali nunger den aitepa repranga aliba, iba Hornbill benjong amongba ajanga India nunger-ia asen Naga lima indang tali jangja-jangjaa meteta kümogo. Atangji, asen Naga nunger Hornbill benjong amongba tajangzükji aji ka asütsü.

Ano iba Hornbill benjong amongba ajanga asen Naga nunger sobaliba, yar-tsüngsang, kenten-menu, Achi-ajemba, aseni züsentetba aser aseni yanglutetba osettsüset (Handlooms & Handicrafts) itemji bendangertem dang sayua metetdaksüba (Advertise) aser itemji ayokba ajanga asen Naga nunger senpongi tangar bendanger sen talila tajangzük bener aitba (Revenue), iba amala tajangzük aika dang lir. Ano iba den külemi, tangar bendanger kintemi Naga lima meta-meyang, tekong-tenem aser topur ajung tali jangja-a meteta akümba, aser tongtipangsa asen Naga lima alima 'Tourist Map' nung tenung ajenlokba, ibaji kangasa tajangzük tulu-ka asütsü. Ano kanga dang tongtipang tajangzük kaji, iba Hornbill benjong amongba ajanga asen Naga nunger kintem rongnunga kin kati kin ka indang sobaliba, yar-tsüngsang, kenten-menu, achi-ajem, libaliro, yimya-tsüya tejangja memetetjemi aliba, kin kati kin ka indang tali metetjema akümbaji tajangzük tulu-ka asütsü. Atangji, iba Hornbill benjong amongba ajanga asen Naga nunger kintem tsüngda nunga temeimtep, tesentaktep aser telongjem tali akangshia kümaktsüba angur.

Ano iba Hornbill benjong amongba nung kanga tekümdangtsü kaji, asen Naga nunger aika akhi mapang dang nungi talila chidiyungdia kümogo. Otsüla-oboula nunger-i, yi ajembaji par sobaliba nung chiyungtsü tajungtiba ta chiyunga-jema aru, saka kodang limapur nungi Khristan aküm, Naga nunger aikati iba chidiyungdiba yimyaji endok, saka tang Hornbill benjong amongba ajanga iba yimyaji tanaben shilua bener arua yimya suba-a küma odagi. Ano aji dang masü, iba benjong mapang, kijung lanur aser lanutsür, aier-asangur, aser aturar dena machi-majemtsü chia-jemer, japojarua, nukdapangta-a, sepleptsüba aser lidi-pudia senzütsüba yimya suba-a kümdaktsüba küli aika angur. Ano Hornbill benjong amongba ajanga lokti temenen (Social evils) aika temai jateta adokba küli aika angur. Anungji sorkar-i ibaji kanga suoki yia agitsüla, aser item mapatemji nokdangtsü lenmang (Remedies) bushitsüla. Aji oda, kechi mapa sudir suaka, tajangzük anguba dang nungibo, alima menendaktsüba, nubur raksadaksüba aser akoksadaksüba tuluba sura, ajibo khen meyipa reprangshitsüla. Mapabo tajung sernung tajangzük anguba dang nungi teraksa adokdaksüba-ang tuluba sura, ajibo khen meyipa reprangshi nungang tajungba asütsü ta nuburtem-ibo shisadanger.

(Maneni asüng adok nung...)

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Uttar Pradesh nung Pastor ka apuba sülen Tenla ki 7 shibangtsüogo



Pastor Dashrath Gupta

**December 29, 2023:** Uttar Pradesh state kübok Maharajanj district nung Nautanwa police-i pastor ka apuba sülen tawa pa bail nung chiokogo.

Interview ka nung jembidang pastor kinüngtsü aser jabaso nati, tiyazü nung pa nem tai tonglokja apu, ta metetdaksü.

Pastor Dashrath Gupta ya Nautanwa administrative division kübok Barwa Khurd yimtsüung nungi lir. Arogo nung züngsem tetsür kati pastor anema ken o agütsüba sülen pa apu.

Arrshi kum 42, pastor Gupta-i tetsür ka tamangba yimsü meyipdaksütsü atema la mesüzük, ta tai tongloktsüba sülen November 25 nü police-i pa pua liasü.

Uttar Pradesh Freedom of Religion Act ozüung kübok pa apu.

Iba Act nung Arrla 3

ajanga nisung kati tangar ka mesüzüka, kangshia mesüra ashikülak lenmang balala ajanga yimsü meyipdaksütsütsü memelar aser Arrla 5 kübok aibelenerji kum 1 nungi kum 5 tashi tepuokdak ayutsü akok aser senchi tajemba agi sen 5,000 achitsü akok.

December 5 nü Pastor Gupta nem bail agütsü aser December 12 nü chiokogo.

Osangbener den jembidang pastor Gupta-i, tebur kati pa kinüngtsü dangji pastor anema ken o benoktsü ajungshiba sülen lai pastor anema ken o benok, ta metetdaksü.

Gupta-i, "La kinüngbui la dang, nai documents kar nung sign mesüra pai la sendoktsü, ta amokmerena liasü. La indang mobile phone-a meshizüka ayu, ibayongji lai onok den-a tongtepratep mesüteti ni

anema ken o benok," ta metetdaksü.

La ya tesüiba kum ka tashi iba Arogo nung dena liasü. Yaküm lai Arogo bushia arua la kinüngbu atema sarasademajng ta mepishisa liasü, iba sülen nungjagi la Tenla kidangi teti aru aser tamanger tajung ka aküm, ta pastor-i metetdaksü.

La Tenla kidangisa aobaji la kinüngbui metetba sülen la kinüngbui pastor nem tai tongloktsütsü atema asalentong yanglua liasü.

Pastor Gupta-i kilometer 20 telongtet nung Arogo tenet nung tekülem sentong agia aru aser yimtsüung aikati K h r i s t a n t e m j i meketmeseni liasü.

Barwa Khurd yimdaklirtemi Gupta dang yimdak Tenla ki den külemi anasa aliba yimtsüngtem nung Tenla ki trokji shibangtsüla, ta amokmerena liasü.

Pastor Gupta aser pa kinüngtsü na tanur trok sosema lir aser tanurtemji arrshi kum 10 nungi arrshi kum 22 tsüngdapurtem lir.

Mezüngbu Gupta ya Hindu nunger liasü, ajisüaka pai Khrista agizükba sülen kum ana tejaklen pai yimdak Arogo tenzük, iba sülen maneni pai Arogo trok tenzüka liasü. Ajisüaka tangbo Tenla ki tenetpronglaji shibangja lir.

Tamalen-a police-i pa anaben tashi pua liasü.

Interview ka nung jembidang Gupta-i, "Tangbo ni atangji metetogo, anungji ni kodanga Yisu metoktsütsü. Ni Khrista atema asütsü melunga dang lir, kechiyong ni süadokyonga ni kü Kümtetdakba ajurutsü ta ni meteta lir," ta ashi.

# Küm piyong nung kakat teimtiba ayokba kakatji Laishiba lir

**December 29, 2023:** 2023 kum nunga kum tepiyong nung teimtiba ayokba kakatji (Best Selling Book of The Year) Laishibasa lir, ajisüaka best-seller lists ka nunga mangutsü.

Kum shia teimtiba ayokba kakatji Laishibasa lir, ta The New Yorker-i metetdaksü.

"United States nung Laishiba kwisa ayokerar züngdangtsüji mapa kanga tasak, ajisüaka 2005 kum kija nunga America nungertemi Laishiba million 25 aliogo ta asadangteter. Iba denji medemdangra ibaji tawa

adokba kakat Harry Potter ayokba dang nungi anasü agi teimba lir," ta 20076 kum osang ka ajanga metetdakja liasü.

Kum shia Laishiba alidang indokba senji dollar sen billion tesimal shi lir.

Guinness World Records-ia Laishiba ya 'best-selling book of all time' ta sangdongogo.

Ajisüaka best-seller lists nung Laishiba mezüngokba kuli aika lir, item kuli rongnung kaji-kakat tasen adokba dang asadangba ajanga lir, tanabuba kuliji Laishiba publishers aika aliba

ajanga aser oshi balala nung adokba ajanga lir.

Aji oda süaka kum shia kakat teimtiba ayokba kakatji maneni Laishibasa lir. America nunger shilem 88 ket nung Laishiba lir aser alima nung Laishiba shilem 4.4 bo parnok ket nung lir.

"Tesüiba kum 1500 tsüngda Laishiba kwi 'print' asüar mejangja, ajisüaka 2021 kum British & Foreign Bible Society-i agiba study ka ajanga, tesüiba kum 1500 tsüngda Laishiba billion 5 nungi billion 7 shi 'print' süogo, ta bushiteta liasü.

# ANOGO ABEN TSÜNGREM DEN

## TANÜ-A KOMA

*Aser ni teka tajichi agi na metsüdaksüra, aji leptokang, aser aji na nungi endokang, kechiaser temang ajak molumi-i aidangbo na asoshi tenük telen ka sama tajungba.*

**~Mathi 5:30**

Temeyong ka nung kenu mapa inyakdang ai (thorn) tila ka ai. Iba ai ji kü temeyong nungi magizük tashi kangasa timtem. Tenük-telen ka kangshira, ajak kangshir, aser tenük telen ka akhum ketra, iba denji ajaki pelateper 1 Korint 12:26.

Asen mangji ka dang lir aser aseni mazoktetra iba ajanga molumi aitsü koda tetsübuttsü. Nai ne mang anepalua kümdangra iba ji na asoshi tajangzük, temoatsü tepela aser jangratemtsü.

Ya magütsütsüla ta asüyonga odang agütsüatoker alir. Ya magizüktsüla ta asüyonga agizükatoker alir.

Yamai sign mesütsütsüla ta asüyonga odang sütsür alir.

Majunga ta metetaka inyakbaji asen tamanger taküm nung odang ajurua aor. Nai a koda sula? Yisu asoshi ji item tila teri agi asen molumi majangzüktsü indang kümdangtsü ashir. Anogo tasen ka tenzükdang nai iba lai o angateta azüngtsü merangangma.

### SARASADEM:

Nai moatsüba tenüktelen shidak azüokteta jajatsü nai ni yariangma.

# Uganda nung Muslim nunger kati tetsüi Khrista agizükba atema la tepset

**Nairobi, December 29** liasü.

**(Agenies):** Tan ita Uganda linük nung Muslim nunger jabaso kati tetsüi Yisu Khrista agizükba atema tepsetogo.

Arrshi kum 25 Muslim nunger, Ashirafu Basalirwa ya Saudi Arabia nung kum pezü mapa inyaka aliba sülen December 15, 2023 nü Busia jila nung aliba par kidangi meyipa arua liasü. Pai kidang tetsü, Sawuba Naigaga-i sarasademdang Yisu tenüng tetshiba angashi.

Hospital nung lar medemer ka den jembidang lai, "Ni sarasademba mapang nung ozü jabaso 'oja, oja, na ya asen kibong atema aser Allah yimsü atema tenüng menük ka kümdar' ta ashiba ni angashi," ta metetdakja liasü.

"Ni ola madoki liasü, pai kü dak anungba ajanga ni alang, iba sülen pai oset kati kü kolak yirutsü. Iba sülen ni süchia ao aser hospital nung ang saak," ta lai la masüdang lemsatapa

December 15 nü lar jabaso la yirutsüba sülen la anogo ana hospital nung amongdang süadok.

Lar medemer jagi, "Ni Sawuba den Yisu Khrista osangtajung lemsatapa liasü. 2022 kum lai Yisu nem la taküm bendanga agüja liasü. Iba mapang nungjagi tenzüka künaprongla Tenla kidangi ao, ajisüaka lai la tamangba yimsü tasenji lar kibong züngsemtem dang mimshia liasü," ta ashi.

La süadokba sülen lar jabaso jena oadokogo.

Uganda linük temzüng aser tanga ozüngtem ajanga linük nung ajak nem yimsü temeden agütsür, pei yimsü tangar den lemsateptsü aser tangar ka yimsü meyipdaksütsü atema temeden agüja lir, ajisüakaiba temeden ya atangji nungbo mebenshiteter.

Uganda nung nütsüung shilem 12 shi dang Muslim nungertem lir, aser parnok teimbaka linük anüdoklen tsütsü lir.

**AO OSHI ANGAZÜKDAK:**

**TANÜ ANGAZÜKTSÜBA OJANG**



Tir Yimyim

**Shimelang**

(n) shi tetsü tewazük tilaka (piece of meat)

\* Telok chiyong dang nisung shia shimelang kaka enoktsü.

**Shimelangnaro**

(n) süngdong nung raloker apungba naro ( type of orchid flower)

\* Tanü asüngbo shimelangnaro apungba süngdong mali kümogo.

**OLONG PAITEP # 6654**

1						2				3
								4		
5		6				7				
8										9
								10		
					11	12				
		13								
14						15				
					16					

**TIPIEN**

- 1. Ojembitsü tashi - 8
- 5. Süngjang tapu ka - 5
- 7. Tekanük nung enokba - 5
- 8. Teka amtep - 5
- 12. Tzük asendak - 5
- 14. Tsünpang tema aliba - 5
- 15. Ken atenba yimya - 5
- 16. Asangur - 8

**LANGTSÜNGLEN**

- 1. Tepok telung nung shilem ka - 7
- 2. Tamajung aküm - 5
- 3. Chi den külemi achiba - 3
- 4. Meimchir alimai aruba - 3
- 6. Laishiba nung ayong ka - 4
- 9. Tarutsü nükla - 7
- 10. Tamendakdak/Nükjiong - 4
- 11. Tenük-telen mejungi aküm - 5
- 13. Terok nungi adokba - 3
- 14. Meimchir telemasa - 3

**OLONG PAITEP # 6653 TELANGZÜBA**

**TIPIEN :**

- 1. Taa, 3. Teküm, 6. Aibelen,
- 7. Aut, 9. Ajizük, 10. Ojala,
- 11. Semer, 13. Sen,
- 15. Kiochtsü, 17. Itsük, 18. Kar.

**LANGTSÜNGLEN :**

- 1. Tai, 2. Asensor, 3. Tanü, 4. Kua,
- 5. Mitsüksü, 6. Azübenshi, 8. Lah,
- 9. Jangkok, 12. Akok, 14. Nashi,
- 16. Sür.



Tanur asoba anogo nung salem osang den noksa angati adokdaksünura - Tenüing, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tiryimyim@gmail.com nung yokang mesüra Tir Yimyim bureau tem nung agüjang.

**Tepela Tasoba Anogo**



- 1. Tenüing : .....
- 2. Tasoba anogo: .....
- 3. Küm : ..... 4. Class : .....
- 5. School : .....
- 6. Talidak : .....
- 7. Salem osang : .....

**Hindu nunger telok kati Christmas decorations raksatsü**



Nalbari district kübok Satra nung aliba BPCL petrol pump nung CCTV ajanga tangokba noksa ka angur.

**Guwahati, December 29, 2023 (Agencies):** Lower Assam kübok Nalbari district nung Hindu nunger telok kati Christmas sobutsü enokba raksatsü.

Iba lendong ya Satra nung Ohma Energy Station (BPCL petrol pump) nung atalok. Yasüing 7:30 ako meta lanur ishika petrol pump-i aru aser Christmas decorations atema ashishitep.

Lanurtem jagi parnok Hindu right wing group ka nung züingsemtem ta ashi aser lights, stars, & Christmas trees agientsü ashi ta petrol pump staff-i ashi.

Iba mapang staff-i agizüksü memelung aser idangji parnok tsüingda raratep aser lanurtem jagi decorations raksatsü aser petrol pump rongdoktsütsü amokmeren. Item ajak ya CCTV footage nung lir.

RO ketdangsürtemi Christmas tenüing nung December 24 nü lights, stars aser Christmas trees enoka liasü.

Lanurtem jagi dispensing machine nungi nozzle agizükter totzü endoktsü merang. Iba jagi police tem dang osang sangoktsü aser parnok tonga aru.

Iba dak sendakba nung

Ohma Energy Station ketdangsürtemi Ghograpar police station nung ken o balala ana benok saka FIR bo magütsü, ta Nalbari SP Supriya Das-i ashi.

"Onoki iba tatalokba bushisüngdang südar aser ozüing melaba ama mapa inyaktsü. Ken o ka benoktsü" ta SP Das-isa ashi.

"Onoki Independence Day, Republic Day, Bihu, Holi, Diwali aser Christmas ama benjung aser national days ajak nung petrol pump nung decorations enokogo. Onok ama shishilembartemi atema sodi anogotem decorations enoker aser iba ya lokti nem benjung salem lemsateper" ta Ohma Energy Station-i metetdaksü.

"Ozü petrol pump nung atalokba atema temulung raksar. Onoki teti Northeast region nung temeyoktep aser putepa alitsü nungiter. Linük ajunga ya secularism aser inclusion tangatetbatem nung amendaka lir ta onoki amanger" ta Ohma Energy Station proprietor Anjali Tirkey-i ashi.

**NSCN (YA)-i Arunachal ex-MLA khasetba tenüing agir**

**Guwahati, December 29, 2023 (Agencies):** Arunachal Pradesh nung taoba MLA Yumsen Matey tepsetba atema National Socialist Council of Nagaland (NSCN-YA)-i tenüing agiogo.

Matey-i NSCN maparen anema maparen nung shilem agiba atema 16/12/2023 nü pa tepset ta NSCN-YA-i sangdong ka nung metetdaksü.

Yumsen Matey ya Arunachal Pradesh nung taoba

Congress MLA liasü aser Myanmar arrtsü anasa Tirap district kübok Raho village nung khaset.

Tirap District nung Matey-i NSCN anema olulu aser osangtem prokshi aser NSCN/GPRN anema tasa atong ta NSCN-YA-isa metetdaksü.

Matey-i küm aika Naga public anema inyaka aruaka küm aika aremzüka dang aru. Ajisüaka pai ozüing alema inyakba manen aser iba ajanga

iba mapa inyaktsüsa aküm ta NSCN-YA-isa ashi.

Pa khasetba ya Arunachal Pradesh state assembly election den sendaktepa mali aser NSCN/GPRN-i Indian state politics nung kodanga shilem magütsü ta parnokisa ashi.

Onük alizüingtem anema noktaktertemji Naga nunger anemertem ta ashitsü aser kodanga maremzüksü ta N S C N - Y A - i s a metetdaksüogo.

**Tawang nung feet 73 talang nung linük wako ka atsüket**



**Itanagar, December 29, 2023 (Agencies):** Arunachal Pradesh kübok Tawang nung December 29, 2023 nü otsü tasen ka yangluogo aser ibaji azüklen feet 73 talang linük wako atsüketba lir.

Indian National Flag ya sea level tema 15200 feet nung atsüket.

Tawang MLA Tsering Tashi aser with Flag Foundation of India CEO Major General

(Retd) Ashim Kohli na külemi linük wako atsüket. Iba sentong nung Brigadier Vipul Singh Rajput, Commander Tawang Brigade aden.

Iba sentong nungsa District Administration, Indian Army, ITBP & SSB aser 2 Arunachal Pradesh NCC Battalion NCC Cadets aden.

Indian Army Ceremonial Guard ajanga Rashtriya Dhvaj Salute agütsü aser idangji Pipe

Band ajanga National Anthem atem.

Tawang MLA Tsering Tashi-i arrtsü anükertem dang pelaba metetdaksü. Paisa Tawang nung civil military amalitepa atema tenüingsang agütsü.

Tawang nung High Mast National Flag atsüketba ajanga asenok talk longjemtsü, sendakteptsü aser linük tashi aittsüba ajungmesotsü ta MLA Tashi-isa metetdaksü.

## PTI lenirtemi tepuokdak Imran Khan ajurutsü mela

**Islamabad, Luchii/ December 29 (Agencies):** Pakistan indang taoba ato kilonser Imran Khan, shiba ochimashi ken o nung aija Adiala Jail nung ali, pa semdangtsü asoshi Islamabad High Court-i Hokulbarnü Pakistan Tehreek-e-Insaf (PTI) lenirtem aser lawyers nem temelaba agütsü, ta osang kar ajanga ashi.

Pakistan nung general elections tonga arur aser parnok ya PTI tetsüti den election senden amentsü mela. Election ya February ita agütsü lir.

Court ajanga iba totuyuba agütsüba sülen tangbo Imran Khan-i party züngsem Asad Qaiser, Junaid Akbar Khan, senators Aurangzeb Khan aser Dost Mohammad Khan, aser Ishtiaq Meherban nung ajurutsü.

Party-i Adiala Jail indang superintendent dang Imran Khan aser par legal team ajurutepa jembishinüba temai madoktsü asoshi totuyuba agütsütsü court dang ajungshia liasü.

Tickets lemsatsüba atema

Imran Khan-i telemtetba agütsü, ta PTI chairman Gohar Khan-i ashi. Ticket lemsatsüba mapang tepuokdak aliba PTI lenirtem asoshia bilema inyaksü, ta ano PTI züngsem Ali Zafar-i ashi.

Nominations agütsüba mapang Deobarnü tembangogo aser returning officers temi nomination papers asadanga mapang lir.

Court ajanga iba totuyuba agütsüba mapang interim Prime Minister Anwar-ul-Haq Kakar-i anir aliba caretaker government aija liasü. "Tang aliba interim government kübok inyakyim tamajung ka tenzüka lir, kong elections asoshi shisa agitepba-a memelar," ta Islamabad high court judge Miangul Hasan Aurangzeb-i ashi.

"Caretaker government yagi elections inyakyim raksatsüner asü?" ta pai Pakistan attorney general Mansoor Usman Awan dang asüngdanga liasü.

Interim government aser Pakistan election commission dang Pakistan supreme court judge kati election shidak agia

nüburtem pei mulungba shidaksütsü sorkar mapa lir ta ashiba paia athishia ashi.

"Election asoshi shisa agiteptsü asoshi temelaba agütsütsü ya fundamental right lir. PTI chairman aser Imran Khan tsüngta senden amenba anema nokdakba ajanga interim government tangatetba nung tasüngdangtsü lir," ta okatsür temi ashi.

Kasa mapang Khyber Pakhtunkhwa nung aliba provincial election commissioner dang Imran Khan densema yimten yimsüsür temi senchi memonok aliba meshitsü returning officers tem dang asüngdangtsü shiogo. Imran Khan ya Election Commission of Pakistan dang sentsüh sen PKR 200,000 lir.

Imran Khan ya aibelen balala pezü inyakba tai tonglokja lir aser aibelen shia senchi sen PKR 50,000 lir, koba tang tashi memonoki lir. Item aibelen ya March 2022 nung inyak, koba pa parliamentary vote ajanga ato kilonser menden nungi atsüngdoktsü ita ka lia atalokba indang lir.

## Maine nunga US tir election atema Trump nokdang

**Washington, Luchii/ December 29 (Agencies):** Maine indang election ketdangtsü kati taruba küm tir election agütsü aliba nung Donald Trump-i iba state nungi metokteptsü ta ashi aser ibai 'constitutional insurrection clause' ka nung aibelenba mechi lir ta ashir.

2021 küm US Capitol nung rongrongshirong adoktsüsa pai mapa inyakba mechi Trump metemsü akumer, ta Secretary of State Shenna Bellows-i ashi.

Maine dang masü Colorado state nunga Trump ya election nung toktepba nung tenokdanga agüja lir.

Item telemtetba agiba ajanga US Supreme Court ola adoktsü tali ajungshir.

Colorado nungya Democratic voters timba lir, ajisüaka Maine nung telok ana tsüngta voters kasashi lir aser Republican nungi Trump asoshi iba telemtetba ya kangasa majung lir.

Trump campaign ajanga state indang court tem nung iba telemtetba anema ken o benoktsü ta shiogo, aser ken o metembang tashi iba telemtetba mapa kuma maotsü.

Maine nung telemtetba agir ghonda ishika lir America nung nütsüng yongsük timtiba aliba state, California nungbo Republican primary ballot nung Trump alitsü ta sangdong.

Michigan aser Minnesota densema danga state tem nunga tawa Trump ya candidate ka ama tokteptsü aliba nungi nokdangtsü merangba court temi magizük.

Civil War mapang yangluba

US Constitution ka mechi Trump ya tir asoshi tokteptsü temsüa ali asü maliar tatem nung Supreme Court ajanga dang telemtetba agütsü amai lir.

Bellows-i obendang agütsüba nung 14th Amendment mechi Trump ya Maine indang Republican primary ballot nungi indoktsüla ta ashi, kong sorkar anema nokdakba nung dena alir shinga federal office nung amentsü memelar.

Bellows ya Democrat lir aser lai ashiba agi, Trump-i ita aika nungi aser January 6, 2021 nü tashi election nung tim masüba mapa inyak ta tiazü kuli agütsü aser pa bhukumertem ajungmesoa Capitol-i aotsü tuyu.

Pai mapang balala nung pa bhukumer tem dang yimjung nung alitsü aser ozüng amshir yaritsü mepishiba ajanga pa mapa mekepbangtet ta lai ashi.

Iba obendang agütsür BBC News den jembidang, lar state nung election ozüng shidak amshitsü la mapa aser Supreme Court-ia linük ajunga nung iba ken o bentetsü inlar, ta Bellows-i ashi.

"14th Amendment indang section asem nung ajemdaker secretary of state shingaia kodanga tir candidate nem ballot magütsü ta ni meteta lir. Saka tir candidate shingaia sorkar tashi anema nokdakba nung shilem agia mali ta ni meteta lir."

Lai iba telemtetba agiba ya yimtenren tsütsü nungi masü aser ibai kanga junga shisadanga aser ozüng nung ajemdaker lir, ta lai ashi.

Democrat Joe Biden-i 2020 election nung takok anguba

melentsütsü merangba ken o Georgia state nunga aser federal court nunga Trump anema jembitsü lir. Ken o kecha nunga sorkar anema nokdaktsü ajungmesoba nung pa aija mali.

Bellow indang telemtetba ya Trump campaign-i aitsü, aser taoba mapanga la dang iba inyakyim nungi pila alitsü shia liasü.

Trump campaign odongtar Steven Cheung-i Bellows ya Biden bhukumer Democrat ka lir aser lai election nung teka amushir ta ashi.

Maine nung iba telemtetba agiba mapa kuma inyakba nungi nokdangtsü asoshi state court nung ozüng tsütsü tai apuba ken o yakta benoktsü ta pai ashi.

Republican telok nungisa Trump den tir asoshi tokteper temia Maine nung telemtetba agiba ya aija liasü.

Florida governor Ron DeSantis-i ashiba agi, Maine nung iba obendang ya ajanga "Pandora's Box" lapoker aser Republican secretaries of state temi linük south tsütsü arütsülen migrants ken o mechi Tir Joe Biden disqualify sütsütsü merangtsü.

Vivek Ramaswamy-ia democracy asoshi shidakba timtemji yamai lir, ta ashi.

Pai X (Twitter) nung ballot nungi Trump agienra pa tir asoshi toktepba nungi anentsü ta nenshia ashi.

2024 US tir election nung Trump tokteptsü asoshi state kar nung memulunger, kechiaser 14th Amendment ajanga pa office nung amentsü nokdang.

## Pelaba Lemsateper

"Aser aji tamasa aliba ama aoyiji alii meyiper, aser tanelajibo tagütsüsang Tsüngrem dangisa shilangtsü." - Sayutsüngir 12:07



**R. Nükshi Aier (Molungyimsen)**  
June 16, 1950 - December 20, 2023

Onoki kanga dang meima aliba tsürabur ajungbena iba akümüli toktsür aodang ozü den nübo, shisatsü, sarasadem, rongsen aser ano lenmang balala ajanga yariteper ajak dang kangasa pelaba metetdaksür.

Tulusang Tsüngremi nenok ajak molamoshia moajang ta ozü sarasadem.

- Chirnurtem, Sosem-tangsem aser semchir.

## MENUNGRA BILEMTETER



**Tsürabur Anapola (Yaongyimsen)**  
Tasüba anogo 30th Dec 2022

Temeim Oja nai onok toktsür tanü küm ka (1 year) ajunger. Na onok den meliaka, nü mapa tajung, sayubentsü, temeim, taremsük den timtem jenti liaka nai onok asoshi teti sarasademtsüba to onok mulongjang nungi samatsü makok. Na menungrasetana tanü kinüngertemi nü nem akhüm aguja sarasadema amonger-a-ni!!!

-Temeim chirnur, anükapang aser semchirsemnurtem.

## MULUNGNEN O

Temeim kinungbo, teti meima aliba obala  
Aser ajak asoshi chichiba tembar  
Tesunep aser ochishir nisung



**W BENDANGTOSHI AIER (Longjang)**  
November 15, 1942 - December 22, 2023

Pa asüba mapang onok den nübu, rongsen aser sarasadem agi yariba asoshi arogo, lokti tentet balala aser kija kibongtem dang pelaba lemsateper.

Talisa Eden Medical Centre, Dimapur aser yangji inyaker temi tajungtiba nung anepaluba atema temulung taroktiba nungi pelaba lemsateper.

Nenok ajak dang kanga pelar.

Nenoki temeim sayuba kodanga mamadoktsü.

- Kinunger aser adianutem

## Bhushan'er kidang nungi WFI office belenogo

**New Delhi, Luchii/December 29 (Agencies):** Hokulbarnü Wrestling Federation of India (WFI) ajanga taoba WFI tir aser BJP MP Brij Bhushan Sharan Singh'er kidang nungi office belenogo. Sports ministry ajanga tawa tai apuba sülen iba mera ya agia liasü.

"Brij Bhushan'er ki azüngtsüba sülen WFI ya New Delhi nung address tasen ka nungi inyaksü," ta osang ka ajanga ashi.

WFI office tasenba ya Hari Nagar area, New Delhi nung lir.

Sanjay Singh tir kübok WFI panel tasenba anentsüba mapang, iba mera agiba kuli aika rongnung Brij Bhushan'er kidang nungi office lapoka mapa inyakba ya ka lir, ta sports

ministry ajanga ashi. Sanjay Singh ya WFI indang tir ka ama shimteter anogo asem lir sports ministry ajanga anenja liasü.

"Federation inyakyim ya taoba ketdangpur (Brij Bhushan) meyong ki nungi amshir aser yangji asayartem dak tim masüba inyak ta tai tonglokja tang okadak ken o tejembidak lir," ta ministry ajanga shiti nung ashi.

Body tasenba ya taoba (WFI) ketdangpur tazüokba kübok inyaker aser ibaji National Sports Code nung mela mali, ta ministry ajanga ashi.

Olympic medallists Bajrang Punia aser Sakshi Malik aser World Championship medallist Vinesh Phogat nunger densema temaba jenjang nung melangteper temi Brij Bhushan

anema ken o benoka lir aser Delhi High Court nung tang tejembidak lir.

Sanjay Singh sülen Brij Bhushan den yariteper tajung ka WFI tekolakba ama December 21 nü shima liasü aser iba osang angashia Sakshi ya wrestling nungi retire asütsü telemtetba agi, Bajrang-i pa indang Padma Shri meyipa agütsü aser Vinesh-ia la indang Khel Ratna aser Arjuna Award meyipa agütsü aser parnoki federation anitsü BJP MP den tesendaktep tajung alir maginer ta shia liasü.

Indian Olympic Association (IOA) ajanga ano maneni Wushu Association of India tekolakba Bhupender Singh Bajwa ya mendenpuba sür züngsem asem ad-hoc committee ka tenteta lir.

## Nagaland 252/7 nung lir

COOCH BEHAR TROPHY 2023-24



Hokulbarnü Nagaland aser Meghalaya tsüngta Nagaland Cricket Stadium, Sovima nung Cooch Behar Trophy Final Match (Plate Group) asayadang tangokba noksa ka yangi angur.

**Dimapur, Luchii/December 29 (TYO):** Nagaland aser Meghalaya tsüngta Cooch Behar Trophy Final Match (Plate Group) tanü Nagaland Cricket Stadium, Sovima nung tenzüka liasü.

Nagaland-i toss akokba sülen mezüng batting shimteter, saka run kata monguteti opener anaprong out asü.

Yugandhar Singh (Captain) ajanga runs 55 aser Seyievizo Zaputou (Vice Captain) ajanga

runs 77 nguteta Nagaland asoshi runs tera ajangtet. Yugandhar Singh out asüba sülena kanga meranga asaya liasü. Samir Ali (48 runs) aser Thechamo Odyuo (27 runs) nati tongti shilem agia asayaba sülen iba anogo asaya tatemlen Thechamo ya run out asü.

Hokulbarnü Stumps Day-1 nung Nagaland runs 252 ngur wicket tenet out sür lir. Iba final match indang Day-2 ya asüngnep 8:30 ako nungi tenzüksü.

## Carlo Ancelotti 2026 tashi Real Madrid nung alitsü



**Madrid, Luchii/December 29 (Agencies):** Carlo Ancelotti-i Real Madrid den pa indang contract June 2026 tashi atsülangogo, ta Hokulbarnü osang kar ajanga ashi.

Iba yongji pai Brazil indang national football team nung manager mapa meinyaktetsü.

2024 Copa America atema Ancelotti-i mapa magizük tashi atema Brazil Football Confederation ajanga khen atema Fernando Diniz shima liasü.

CBF tir inyaka alisang Ednaldo Rodriguez-i Ancelotti den ita aika jembishinü aru,

shibai Real Madrid ya football nung pa atema mapa tatembangba asütsü ta taoba mapang shia lir.

Ajisüaka football asaya nung tayongzükba tulu aliba aser jenjang tulu aliba mapa yagi pa temulung melenshitsü amai ajiteter.

"Real Madrid aser Carlo Ancelotti tsüngta pa indang contract June 30, 2026 tashi atsülangtsü tezüngzüktep ka agiogo," ta Real Madrid sangdong ka nung ashi.

Arishi küm 64 tain Ancelotti ya taruba küm Real Madrid yutsüba sülen küm 60 nung

bendanger ka pa Brazil indang coach ama inyaker mezüngbuba akumtsü ta taküm July ita osang prokshia liasü.

Saka osangtem ajanga ashiba agi, Italy nung Ancelotti-i Brazil dak saklokba meteta pa nem maongka tajung agütsü.

Ancelotti ya Real Madrid otsü nung takok timtiba ngutetba manager ka ta tenüng zülüoka lir.

Real Madrid ajanga sangdong ka nung, "Pa Real Madrid coach ama season pongu inyakdang titles 10: Champions League ana, Club World Cups ana, European Super Cups ana, League ka, Copas del Rey ana aser Spanish Super Cup ana ngutetogo," ta ashi. "EuropeanCups pezüben tashi takok ngutetba coach ji Carlo Ancelotti dang lir aser iba competition nung takok timtiba (118) nguteter alitsü, aser major European Leagues pongu (Italy, England, France, Germany aser Spain) akoker coach mezüngbuba alitsü."



Brighton, England nung aliba Amex stadium nung Tottenham Hotspur aser Brighton tsüngta English Premier League asayadang Brighton nungi Joao Pedro-i par telok asoshi goal tanabuba agütsür tangokba noksa nangur. Iba asaya nung Brighton-i goa 4-2 agi Tottenham akok.

## Jack Grealish PL asayadang par kidang auya

**Everton, Luchii/December 29 (Agencies):** Manchester City winger Jack Grealish ya Bodhbarnü Everton nung Premier League asayadang par kidangi auer atua auya.

England north-west tsütsü Grealish'er Cheshire kidangi auer atuba mapang pa Premier League champions asoshi asaya liasü, kong par teloki 3-1 agi akok.

Grealish'er kinunger aser pa tetong Sasha Atwood nungertem television nungi iba asaya repranga alidang par kidang ola kar angashi, ta osang kar ajanga Hokulbarnü ashi.

Iba sülen osang prokshia helicopter ka, police indang azü aser police tem par kidangi yoka liasü, saka temulung melemi alir kata meputet.

Iba mapang auer temi sen million \$1.2 jenjang jewellery aser anütetsü auya ta ashir.

Manchester City asaya tembangba sülen arishi küm 28 tain Grealish dang iba osang sangoktsü.

Cheshire Constabulary indang odongtar kati ashiba

agi, December 27 aonung 9:50 ako meta police dang auyaba osang agütsü.

"Osang agütsüri osettsüset aika auyaba indang ashi. Police indang azü aser NPAS (National Police Air Service) teyari nung police tem yoka ki temeket bushia liasü, saka temulung melemteter tsüngsü mongutet."

"Tang tashi nisung kata mapu aser maneni bushisingdangba mapang lir," ta lai ashi.

Pep Guardiola'er telok ya English Premier League takok marok pezüben buba atonga abentsü arishitepa Goodison Park nung asayadang first-half nung taoba mapang City nungi asayar Jack Harrison-i goal ka agüja Everton goal 1 aser City tazüngla liasü.

Saka Minute 53 buba nung Phil Foden-i Jordan Pickford alema goal ka metsüoktsü aser Julian Alvarez-i penalty spot nungi ano goal ka yok.

Iba sülen ano Bernardo Silva-ia kanga junga asayateta asaya tatemlen Pickford-i aibelenba nung goal ka yok.

## BILEMDANGANG

"Nai ajema jembidang tali ang angazüker."